

MALAYSIA
DEWAN RAKYAT
ATURAN URUSAN MESYUARAT

NASKHAH SAHIH/BAHASA MALAYSIA

<http://www.parlimen.gov.my>

HARI KHAMIS, 2 NOVEMBER 2023, PUKUL 10.00 PAGI

Bil. 8

WAKTU PERTANYAAN-PERTANYAAN MENTERI

1. PR-1523-MQT2452
Tuan Lim Guan Eng [Bagan] minta **MENTERI SUMBER ASLI, ALAM SEKITAR DAN PERUBAHAN IKLIM** menyatakan tentang Empangan Air Mengkuang yang disenaraikan oleh SPAN sebagai salah satu daripada 7 empangan air berisiko tinggi di Malaysia dengan menyatakan tindakan yang boleh diambil untuk mengatasi kelemahan dan adakah peruntukan akan diberikan untuk membantu Empangan Mengkuang tidak menjadi berisiko tinggi agar mampu menjalankan fungsi menjamin bekalan air berterusan dan kukuh kepada pengguna di Pulau Pinang.
2. PR-1523-MQT2458
Tuan Shaharizukirnain bin Abd. Kadir [Setiu] minta **MENTERI KESIHATAN** menyatakan pendirian Kementerian berhubung isu Triti Pandemik Perjanjian Konvensyen Pertubuhan Kesihatan Sedunia (WHO CA+) dan pindaan Peraturan Kesihatan Antarabangsa (IHR 2005) yang perlu diputuskan sama ada diratifikasi atau ditolak sebelum 1 Disember ini.
3. PR-1523-MQT2455
Tuan Chiew Choon Man [Miri] minta **MENTERI KOMUNIKASI DAN DIGITAL** menyatakan apakah tindakan segera bagi mengatasi isu menara tanpa kualiti (*naked tower*) di Sarawak supaya tidak lagi timbul masalah kekurangan perkhidmatan capaian internet dan jaringan komunikasi.

MALAYSIA
DEWAN RAKYAT
ATURAN URUSAN MESYUARAT

NASKHAH SAHIH/BAHASA MALAYSIA

<http://www.parlimen.gov.my>

HARI KHAMIS, 2 NOVEMBER 2023, PUKUL 10.00 PAGI

Bil. 65

WAKTU PERTANYAAN-PERTANYAAN MENTERI

PERTANYAAN-PERTANYAAN BAGI JAWAB LISAN

1. PR-1523-L21809
Tuan Cha Kee Chin [Rasah] minta **MENTERI PERDAGANGAN DALAM NEGERI DAN KOS SARA HIDUP** menyatakan sama ada Kementerian akan menaikkan kuota 60,000 tan metrik minyak paket bersubsidi yang mula dilaksanakan sejak tahun 2016, memandangkan pasaran runcit sentiasa menghadapi kekurangan bekalan dan mengakibatkan kesulitan kepada pengguna domestik dan peniaga mikro/ peniaga kecil. Berikan huraian terhadap keputusan/ pendirian Kementerian.
2. PR-1523-L22640
Komander Nordin bin Ahmad Ismail TLDM (Bersara) [Lumut] minta **MENTERI PERTAHANAN** menyatakan perancangan masa hadapan pihak Kementerian Pertahanan bagi kerja-kerja pemetaan dasar laut oleh Pusat Hidrografi Nasional (PHN) sedangkan Tentera Laut Diraja Malaysia (TLDM) sudah melucut tauliah Kapal Diraja (KD) Mutiara pada tahun 2018 yang lalu.
3. PR-1523-L21356
Dato' Ngeh Koo Ham [Beruas] minta **MENTERI LUAR NEGERI** menyatakan apakah tindakan yang telah diambil dan akan diambil untuk menyelesaikan aduan-aduan nelayan Malaysia bahawa bot-bot mereka ditangkap oleh agensi penguatkuasa Indonesia apabila bot-bot mereka masih dalam perairan Malaysia atau di kawasan perairan yang bertindih dengan negara Indonesia.

4. PR-1523-L22423
Dato' Sri Dr. Haji Ismail bin Haji Abd. Muttalib [Maran] minta **MENTERI PEMBANGUNAN KERAJAAN TEMPATAN** menyatakan berapa jumlah peruntukan membaiki dan pembinaan rumah baru bagi penduduk miskin bandar serta pecahan mengikut kaum di Malaysia.
5. PR-1523-L21521
Tuan Haji Ahmad Johnie bin Zawawi [Igan] minta **PERDANA MENTERI** menyatakan perkara-perkara dalam Perjanjian Malaysia 1963 bagi Sarawak yang telah dimuktamadkan dan apakah lagi perkara-perkara yang belum diselesaikan. Nyatakan dengan terperinci.
6. PR-1523-L21959
Tuan Fathul Huzir bin Ayob [Gerik] minta **MENTERI BELIA DAN SUKAN** menyatakan cadangan membina fasiliti sukan memanah profesional di daerah Pengkalan Hulu memandangkan daerah Hulu Perak suatu ketika dahulu melahirkan lebih 10 orang atlit sukan memanah kebangsaan.
7. PR-1523-L21271
Tuan Chiew Choon Man [Miri] minta **MENTERI PEMBANGUNAN KERAJAAN TEMPATAN** menyatakan bilangan isi rumah yang duduk di dalam rumah setinggan di Bandar Raya Miri serta langkah Kementerian dengan kerja sama Kerajaan Sarawak dalam menangani isu rumah setinggan yang sangat serius di Bandar Raya Miri.
8. PR-1523-L22013
Tuan Haji Kamal bin Ashaari [Kuala Krau] minta **MENTERI KOMUNIKASI DAN DIGITAL** menyatakan berapa lama tempoh yang diperlukan oleh pihak Kementerian agar capaian internet dan liputan telekomunikasi di Kuala Krau dapat diperbaiki terutamanya di kawasan pedalaman seperti Kerdau.
9. PR-1523-L21553
Tuan Mohd Sany bin Hamzan [Hulu Langat] minta **PERDANA MENTERI** menyatakan apakah Kerajaan berhasrat meminda Perlembagaan bagi mewajibkan terus setiap rakyat Malaysia yang sudah cukup umur 18 tahun untuk keluar mengundi.
10. PR-1523-L22473
Tuan Sabri bin Azit [Jerai] minta **MENTERI SAINS, TEKNOLOGI DAN INOVASI** menyatakan langkah mengatasi kesan negatif daripada teknologi kecerdasan buatan (*artificial intelligence*) contohnya penipuan maklumat, berita palsu dan *deepfake*.

11. PR-1523-L21339
Tuan Haji Yusuf bin Abd. Wahab [Tanjong Manis] minta **MENTERI KOMUNIKASI DAN DIGITAL** menyatakan apakah perkhidmatan menggunakan satelit STARLINK akan digunakan di kawasan Parlimen Tanjong Manis untuk memperluaskan capaian internet kepada penduduk luar bandar.
12. PR-1523-L21756
Dato' Sri Ikmal Hisham bin Abdul Aziz [Tanah Merah] minta **MENTERI PERTAHANAN** menyatakan penjelasan daripada Kementerian Pertahanan mengenai situasi di Pangkalan Udara (PU) Sendayan yang masih tidak mempunyai kemudahan landasan kapal terbang. Apakah ada perancangan masa hadapan untuk Kementerian membina landasan kapal terbang di PU Sendayan sebagaimana kemudahan landasan kapal terbang yang pernah wujud di Pangkalan Udara Sungai Besi suatu ketika dahulu.
13. PR-1523-L21592
Tuan Roy Angau anak Gingkoi [Lubok Antu] minta **PERDANA MENTERI** menyatakan apakah status terkini pelaksanaan projek pembinaan jambatan di Lubok Subong, Nanga Kesit di Lubok Antu yang telah diluluskan di bawah Projek Khas Timbalan Perdana Menteri pada tahun 2019 tetapi memerlukan peruntukan tambahan berikutan perubahan tapak ke lokasi yang lebih strategik.
14. PR-1523-L22376
Dato' Seri Dr. Shahidan bin Kasim [Arau] minta **MENTERI BELIA DAN SUKAN** menyatakan perancangan dan tindakan-tindakan yang telah dan akan diambil oleh Kementerian bagi memastikan kejayaan Malaysia dalam sukan SEA yang akan datang setelah dakwaan Menteri yang mengaitkan pertukaran menteri sepanjang empat tahun telah menyebabkan dasar-dasar sukan negara menjadi tidak menentu dan menjadi antara penyebab kegagalan Kontinjen Malaysia mencapai sasaran 40 pingat emas pada sukan SEA 2023.
15. PR-1523-L21900
Tuan Jimmy Puah Wee Tse [Tebrau] minta **MENTERI PERDAGANGAN DALAM NEGERI DAN KOS SARA HIDUP** menyatakan :
 - (a) statistik jumlah program Jualan Rahmah yang telah dijalankan oleh KPDN setakat September 2023 dalam usaha meringankan beban rakyat mengikut pecahan kawasan Parlimen dan penerima manfaat; dan
 - (b) perancangan Kementerian untuk memperluaskan lagi program Jualan Rahmah pada masa hadapan.

16. PR-1523-L22598

Tuan Wan Ahmad Fayhsal bin Wan Ahmad Kamal [Machang] minta **MENTERI KOMUNIKASI DAN DIGITAL** menyatakan perancangan Kementerian untuk menaik taraf akses dan kapasiti capaian jalur lebar bagi Daerah Machang. Untuk makluman YB Menteri, Daerah Machang adalah pusat ilmu yang mempunyai cawangan UiTM, Sekolah Berasrama Penuh (SBP) dan sekolah-sekolah agama rakyat. Mereka memerlukan capaian internet yang baik untuk pendidikan yang sempurna. Begitu juga kawasan seperti di Bukit Tiu dan beberapa kawasan.

17. PR-1523-L22368

Tuan Chong Zhemine [Kampar] minta **MENTERI BELIA DAN SUKAN** menyatakan sasaran pingat Sukan Asia 2023 dan pecahan sasaran pingat untuk setiap sukan.

18. PR-1523-L22647

Dato' Syed Abu Hussin bin Hafiz Syed Abdul Fasal [Bukit Gantang] minta **PERDANA MENTERI** menyatakan perancangan seterusnya bagi mengatasi masalah struktur bangunan Masjid Jamek Al-Istiqlal, Taman Mewah yang semakin tidak selamat untuk digunakan sebagai tempat beribadat orang Islam. Adakah mahu menunggu kemalangan jiwa barulah tindakan daripada Kerajaan diambil.

19. PR-1523-L21372

Dato' Sri Sh Mohmed Puzi bin Sh Ali [Pekan] minta **MENTERI PERDAGANGAN DALAM NEGERI DAN KOS SARA HIDUP** menyatakan apakah bentuk pemantauan yang dilaksanakan Kerajaan terhadap pengoperasian restoran atau kedai makan yang menipu penggunaan logo halal bagi mengelirukan pelanggan dan menggunakan bahan terlarang atau haram dalam masakan.

20. PR-1523-L22425

Tuan Haji Mohd Hasnizan bin Harun [Hulu Selangor] minta **PERDANA MENTERI** menyatakan usaha-usaha Kementerian bersama dengan pengurusan FELDA dan peneroka untuk mencapai sasaran sekurang-kurangnya 8 tan hasil bagi tempoh satu bulan.

21. PR-1523-L22262

Dato' Seri Hishammuddin bin Tun Hussein [Sembrong] minta **MENTERI PEMBANGUNAN KERAJAAN TEMPATAN** menyatakan apakah usaha yang diambil Kementerian untuk menangani isu kesukaran pemilikan rumah oleh pembeli dan rumah siap yang masih belum terjual ekoran laporan Pusat Maklumat Harta Tanah Negara (NAPIC) menjelaskan lebih 27 ribu unit kediaman yang siap dibina tetapi tidak terjual bernilai RM18.41 bilion pada suku tahun keempat 2022 di mana unit kediaman tertinggi yang tidak terjual adalah kediaman melebihi RM300 ribu dengan jumlah lebih 17 ribu unit.

22. PR-1523-L21707

Tan Sri Dato' Haji Mahiaddin bin Haji Mohd. Yassin [Pagoh] minta **MENTERI PERDAGANGAN DALAM NEGERI DAN KOS SARA HIDUP** menyatakan langkah tegas yang telah diambil oleh Kerajaan khususnya dalam menangani isu kos sara hidup dan inflasi secara menyeluruh.

23. PR-1523-L21350

Datuk Seri Panglima Bung Moktar bin Radin [Kinabatangan] minta **MENTERI SAINS, TEKNOLOGI DAN INOVASI** menyatakan apakah perancangan pihak Kementerian untuk melibatkan lebih ramai golongan belia dalam usaha menjayakan dasar sains, teknologi dan inovasi negara.

24. PR-1523-L22549

Datuk Haji Awang bin Hashim [Pendang] minta **PERDANA MENTERI** menyatakan senarai syarikat yang diberikan secara tender terus bagi projek-projek yang melibatkan agensi-agensi di bawah seliaan Jabatan Perdana Menteri dan berapa nilai siling yang ditetapkan.

25. PR-1523-L22263

Dato' Seri Hishammuddin bin Tun Hussein [Sembrong] minta **PERDANA MENTERI** menyatakan adakah Kerajaan berhasrat untuk menyemak semula persempadanan bahagian pilihan raya berdasarkan Peruntukan Perlembagaan Persekutuan 113(2) selepas kali terakhir dipinda pada tahun 2016 memandangkan jumlah pemilih pada PRU15 juga telah bertambah sebanyak lebih 6 juta pengundi selepas pewartaan Seksyen 3(a) dan (b) Akta Perlembagaan (Pindaan) 2019 yang membenarkan Undi18 dan pendaftaran pemilih secara automatik.

26. PR-1523-L22220

Datuk Seri Takiyuddin bin Hassan [Kota Bharu] minta **PERDANA MENTERI** menyatakan kesediaan Kerajaan dalam melaksanakan janji manifesto Pakatan Harapan berkenaan pelantikan Ketua Pesuruhjaya SPRM yang perlu disemak oleh Jawatankuasa Pilihan Khas Parlimen yang bersifat dwi-partisan dan mekanisme untuk memastikan badan penguatkuasa tersebut bertindak secara bebas dan adil.

27. PR-1523-L21997

Tuan Muhammad Ismi bin Mat Taib [Parit] minta **PERDANA MENTERI** menyatakan sejauh mana Kerajaan Persekutuan bersungguh-sungguh untuk melaksanakan peruntukan kawasan sama rata kepada semua ahli Parlimen tanpa mengira parti yang akan disalurkan terus melalui Parlimen Malaysia dan bukannya dari pejabat Perdana Menteri.

28. PR-1523-L22320

Dato' Dr. Alias bin Razak [Kuala Nerus] minta **MENTERI PEMBANGUNAN KERAJAAN TEMPATAN** menyatakan sejauh mana Kementerian berhasrat memasukkan inovasi perumahan China ke dalam sektor perumahan negara dan adakah inovasi tersebut bersesuaian dengan spesifikasi perumahan semasa negara.

29. PR-1523-L21926

Dato' Haji Mohd Suhaimi bin Abdullah [Langkawi] minta **PERDANA MENTERI** menyatakan bilakah kerajaan akan:

- (a) meluluskan elaun seberang laut bagi penjawat awam yang bekerja di Langkawi dan menyediakan ambulans laut bagi kegunaan penduduk Pulau Tuba; dan
- (b) menyelesaikan masalah perkhidmatan feri di Langkawi seperti mana YAB Perdana Menteri berjanji ketika kempen PRN di Langkawi.

30. PR-1523-L22063

Tuan Zahari bin Kechik [Jeli] minta **MENTERI PEMBANGUNAN KERAJAAN TEMPATAN** menyatakan status Projek Balai Bomba dan Penyelamat Kuala Balah, Jeli, Kelantan yang telah diluluskan oleh Kerajaan sebelum ini.

31. PR-1523-L21167
Tuan Prabakaran A/L M Parameswaran [Batu] minta **MENTERI PEMBANGUNAN KERAJAAN TEMPATAN** menyatakan apakah Kementerian berhasrat untuk membina perumahan baru bagi membolehkan penggantian unit kepada penduduk yang sedang menduduki rumah berkeluasan 500 kaki persegi kepada unit baru yang berkeluasan sekurang-kurangnya 1000 kaki persegi.
32. PR-1523-L22556
Dato' Ahmad bin Saad @ Yahaya [Pokok Sena] minta **PERDANA MENTERI** menyatakan langkah Kerajaan untuk memastikan pematuhan terhadap syariat Islam yang menyeluruh merentasi bidang Kementerian seperti dalam sektor pembiayaan kewangan atas talian, kod etika pakaian ke agensi Kerajaan dan sebagainya.
33. PR-1523-L22454
Tuan Afnan Hamimi bin Taib Azamuddin [Alor Setar] minta **PERDANA MENTERI** menyatakan apakah pendirian terkini Kerajaan Persekutuan terhadap penglibatan dan hubungan agensi-agensi Persekutuan dengan aktiviti dan mesyuarat yang dianjurkan oleh Kerajaan Negeri Kedah dan agensi-agensinya.
34. PR-1523-L22193
Tuan Mohd Syahir bin Che Sulaiman [Bachok] minta **PERDANA MENTERI** menyatakan pendirian Kerajaan untuk menghalang penyalahgunaan jentera Kerajaan, termasuklah penggunaan premis sekolah, kenderaan rasmi, dan helikopter, dalam tempoh sebelum dan semasa kempen pilihan raya sedang berlangsung, sebagaimana teguran oleh pihak BERSIH.
35. PR-1523-L22227
Datuk Haji Ahmad Amzad bin Mohamed @ Hashim [Kuala Terengganu] minta **MENTERI SAINS, TEKNOLOGI DAN INOVASI** menyatakan adakah Kementerian mempunyai keupayaan teknologi untuk meneroka tenaga nuklear (R&D) bagi tujuan penjanaan tenaga elektrik sekaligus dapat menggantikan bahan api fosil untuk menjana tenaga elektrik melalui kaedah konvensional.
36. PR-1523-L22272
Dr. Siti Mastura binti Muhammad [Kepala Batas] minta **PERDANA MENTERI** menyatakan :
(a) apakah dasar Tabung Haji dalam mengisi kuota jemaah Haji; dan

- (b) memandangkan pengkelasan pendapatan isi rumah B40, M40 dan T20 ini amat lemah dari segi tafsiran dan kebolegunaan dalam urusan ketelusan bantuan subsidi, justeru apakah kaedah Tabung Haji dalam memperincikan hal ini.
37. PR-1523-L22380
Tuan Zakri bin Hassan [Kangar] minta **MENTERI BELIA DAN SUKAN** menyatakan adakah pihak Kementerian dapat menyalurkan peruntukan bagi menyediakan kemudahan tempat penonton dan bilik persalinan pemain di Kompleks Sukan Kangar memandangkan sambutan anak muda amat hebat ketika Kejohanan Bola Sepak Liga Super Perlis.
38. PR-1523-L22007
Tuan Haji Kamal bin Ashaari [Kuala Krau] minta **PERDANA MENTERI** menyatakan adakah FELDA berhasrat untuk memberi peruntukan tetap sama ada secara bulanan ataupun tahunan khusus kepada Sekolah Agama Rakyat (SAR) KAFA di setiap tanah rancangan FELDA yang rata-rata amat daif, terutamanya di Parlimen Kuala Krau.
39. PR-1523-L22641
Komander Nordin bin Ahmad Ismail TLDM (Bersara) [Lumut] minta **MENTERI PERTAHANAN** menyatakan adakah terdapat rancangan untuk memberi bantuan kewangan insentif secara *one-off* sebanyak RM500 (2 kali bayaran) kepada penerima-penerima Pingat Jasa Malaysia memandangkan ini adalah satu pengiktirafan negara kepada veteran ATM di atas sifat keperwiraan dan pengorbanan di zaman ancaman pengganas komunis.
40. PR-1523-L22239
Tan Sri Haji Abdul Hadi bin Awang [Marang] minta **PERDANA MENTERI** menyatakan sejauh mana kesediaan Kerajaan supaya Lembaga Pengampunan merujuk terlebih dahulu kepada ahli keluarga mangsa bagi mendapatkan keizinan pengampunan sebelum keputusan ditetapkan.
41. PR-1523-L22169
Tuan Wan Razali bin Wan Nor [Kuantan] minta **MENTERI BELIA DAN SUKAN** menyatakan status pembinaan kompleks belia dan sukan negeri Pahang:
- (a) apakah punca kelewatan projek ini ; dan
- (b) garis masa projek ini akan disiapkan dan implikasi kewangan tambahan.

42. PR-1523-L21696

Dato' Khilir bin Mohd Nor [Ketereh] minta **MENTERI PERTAHANAN** menyatakan apakah tindakan Kerajaan dalam memastikan tatakelola yang progresif untuk anak syarikat Lembaga Tabung Angkatan Tentera (LTAT) supaya tidak mengalami kerugian seperti tahun-tahun terdahulu.

43. PR-1523-L22631

Dato' Rosol bin Wahid [Hulu Terengganu] minta **MENTERI PEMBANGUNAN KERAJAAN TEMPATAN** menyatakan menyatakan jumlah projek perumahan terbengkalai di seluruh negara dan perancangan Kerajaan untuk memulihkan projek perumahan sakit yang telah menjejaskan peluang rakyat untuk mendapatkan rumah mampu milik.

ATURAN URUSAN MESYUARAT DAN USUL-USUL

1. (D.R. 31/2023) Rang Undang-undang Perbekalan 2024 - **Menyambung semula perbahasan atas masalah, "Bahawa Rang Undang-Undang ini dibacakan kali yang kedua sekarang," (1 November 2023)**

DAN

Usul dibuat oleh YAB Menteri Kewangan dan masalah dicadangkan :-

“Bahawa Dewan ini, mengikut subseksyen 4(3) Akta Kumpulan Wang Pembangunan 1966 [Akta 406], membuat ketetapan iaitu suatu jumlah wang sebanyak tidak lebih dari sembilan puluh dua bilion ringgit (RM92,000,000,000) dibelanjakan daripada Kumpulan Wang Pembangunan bagi tahun 2024, dan bagi tujuan dan butiran Perbelanjaan Pembangunan yang dinyatakan di bawah Maksud Pembangunan atau (“P”) dalam senarai Anggaran Perbelanjaan Persekutuan 2024, yang dibentangkan sebagai Kertas Perintah 34 Tahun 2023, adalah diuntukkan di bawah Maksud-maksud yang berkenaan jumlah-jumlah yang bersempena dengan butiran-butiran itu di ruangan enam dan tujuh senarai tersebut.”

Menyambung semula perbahasan atas masalah (1 November 2023)

2. (D.R. 33/2023) Rang Undang-Undang Syarikat (Pindaan) 2023 - **Menyambung semula perbahasan atas masalah, "Bahawa Rang Undang-undang ini dibacakan kali yang kedua sekarang," (12 Oktober 2023)**

[Menteri Perdagangan Dalam Negeri dan Kos Sara Hidup]

3. (D.R. 25/2023) Rang Undang-Undang Kawalan Produk Merokok Demi Kesihatan Awam 2023 – **Bacaan Kali Yang Kedua**

Dan;

Pengerusi Jawatankuasa Pilihan Khas Kesihatan oleh Yang Berhormat Datuk Seri Dr. Dzulkefly bin Ahmad, Ahli Parlimen Kuala Selangor akan mencadangkan :

“**BAHAWA** Penyata yang disiapkan oleh Jawatankuasa Pilihan Khas Kesihatan untuk mengkaji Rang Undang-Undang Kawalan Produk Merokok Demi Kesihatan Awam 2023, yang dibentangkan dalam Majlis ini sebagai Kertas DR. 8 Tahun 2023 diperkenankan mengikut Peraturan Mesyuarat 60”.

4. (D.R. 26/2023) Rang Undang-Undang Makanan (Pindaan) 2023. **Bacaan Kali Yang Kedua**
[Menteri Kesihatan]

5. PR-1523-U(27)278
Datuk Seri Ir. Dr. Wee Ka Siong [Ayer Hitam] akan mencadangkan :

"Bahawa Dewan Rakyat ini menggesa Kerajaan untuk segera menangani isu gangguan bekalan beras putih tempatan (BPT) di pasaran yang kian meruncing susulan tindakan India menghentikan eksport beras putihnya ke pasaran.

Langkah penetapan had pembelian maksimum 100kg BPT untuk setiap individu dan syarikat bermula 7 September 2023 hanyalah penyelesaian yang bersifat sementara dan Kerajaan seharusnya mula merangka satu pelan yang lebih tuntas dalam usaha menjamin keterjaminan bekalan beras di Malaysia bagi jangka masa yang panjang.

Kerajaan perlu segera mewujudkan rangka tindakan yang lebih komprehensif bagi mengurangkan impak inflasi makanan global dari terus menghimpit rakyat negara ini khususnya berkaitan beras yang menjadi makanan ruji kita semua."

[Menteri Pertanian dan Keterjaminan Makanan]

6. PR-1523-U(27)279
Datuk Seri Ir. Dr. Wee Ka Siong [Ayer Hitam] akan mencadangkan :

"Bahawa Dewan Rakyat ini menggesa Kerajaan mencari penyelesaian untuk mengurangkan kos pengambilan pekerja asing yang kian melambung tinggi. Kebergantungan majikan tempatan terhadap pekerja asing berbanding pekerja tempatan di negara ini bukanlah perkara asing terutama dalam sektor 3D (*dirty, dangerous and difficult*).

Maka, adalah penting untuk mewujudkan satu dasar yang lebih komprehensif bagi mengurangkan kebergantungan terhadap pekerja asing agar pekerja tempatan diberi keutamaan terlebih dahulu dengan reformasi terhadap ekosistem sektor 3D meliputi kadar gaji, faedah dan sebagainya yang berpadanan dengan risiko pekerjaan perlu diimplementasikan secara berseiringan."

[Menteri Dalam Negeri]

7. PR-1523-U(27)280

Datuk Seri Ir. Dr. Wee Ka Siong [Ayer Hitam] akan mencadangkan :

"Bahawa Dewan Rakyat ini menggesa Kerajaan untuk mewujudkan satu dasar mengutamakan sajian menu buah-buahan tempatan di semua majlis rasmi Kerajaan sebagai galakan dan sokongan kepada pemain industri buah-buahan tempatan serta ke arah membudayakan amalan pemakanan sihat.

Adalah menjadi tanggungjawab Kementerian bagi membantu pengusaha buah-buahan tempatan untuk memasarkan serta mempromosi hasil ladang mereka dan sekali gus meningkatkan pendapatan. Maka melalui sajian menu buah-buahan di kesemua majlis rasmi Kerajaan perlu dibudayakan sepenuhnya sebagai sokongan terhadap industri buah-buahan tempatan.

[Menteri Pertanian dan Keterjaminan Makanan]

8. PR-1523-U(27)281

Dato' Indera Mohd Shahar bin Abdullah [Paya Besar] akan mencadangkan :

"Bahawa Dewan Rakyat menggesa Kerajaan untuk membentangkan perancangan jangka masa panjang yang menyeluruh dalam memastikan Jumlah Kadar Kesuburan (Total Fertility Rate) bagi rakyat Malaysia terus meningkat.

Negara kita telah beralih ke status negara menua pada tahun 2021. Hal ini kerana peratusan penduduk berusia 65 tahun dan ke atas telah mencapai 7% daripada jumlah populasi. Trend ini menunjukkan peningkatan dalam dua tahun lalu pada kadar 0.2 peratus setahun di mana pada tahun 2022 sebanyak 7.2% dan dijangka pada tahun 2023 mencapai 7.4%.

Dalam tempoh dua dekad lagi, negara dijangka beralih kepada negara tua apabila kohort umur yang sama mencapai 14% daripada jumlah populasi. Peralihan ini tentunya memberikan kesan yang paling ketara iaitu kepada penurunan trend populasi pekerja dan produktiviti. Bagi menghadapi cabaran dan dampak negara menua, kita perlu mencari jalan memperlahankan proses penuaan ini. Proses penuaan ini tidak boleh dihalang atau diberhentikan tetapi kita perlu mempunyai pelan persediaan bagi menghadapi situasi tersebut.

Jika kita teliti jumlah peratusan struktur umur penduduk yang berumur 0-14 tahun berlaku penurunan pada kadar 0.4% bagi 3 tahun iaitu ; tahun 2020 sebanyak 24%, 2021 sebanyak 23.6%, 2022 sebanyak 23.2%, dan 2023 sebanyak 22.6%.

Umum mengetahui negara-negara jiran dan serantau juga menghadapi perkara penurunan bagi jumlah kadar kesuburan, tetapi kadar tersebut agak perlahan penurunannya. Sehubungan itu, objektif kita agar dapat melandaikan graf penurunan ini bagi negara kita.

Persoalan saya, apakah kemampuan hospital Kerajaan dalam meningkatkan kemampuan kesihatan reproduktif. Berapa jumlah Hospital yang menyediakan perkhidmatan IUI dan IVF. Berapa ramai doktor pakar reproduktif masih berkhidmat di hospital Kerajaan. Adakah harga perkhidmatan yang dikenakan mampu diakses oleh rakyat. Berapa jumlah makmal reproduktif.

Dewan Rakyat juga perlu mencadangkan agar Kerajaan menetapkan polisi yang mampan seperti fleksibel waktu bekerja, yuran pusat penjagaan kanak yang mampu bayar, perbanyakkan pusat asuhan ditempat kerja, dan *paternity leave* kepada ibu bapa yang bekerja untuk meringankan bebanan mereka dalam meningkatkan kadar reproduktif rakyat Malaysia. *Population Complexity* ini yang harus kita uruskan dengan penuh keberanian dan semua pihak kena bersama-sama."

[Menteri Pembangunan Wanita, Keluarga dan Masyarakat]

9. PR-1523-U(27)283

Dato' Indera Mohd Shahar bin Abdullah [Paya Besar] akan mencadangkan :

"Bahawa Dewan Rakyat menggesa Kerajaan untuk membentangkan sebuah Kertas Putih Imigresen yang membincangkan tentang kadar atau jumlah sebenar kemasukan pelawat asing ke negara Malaysia.

Perkara ini bertujuan untuk mengetahui pergerakan pelawat asing berkenaan sama ada mereka terus tinggal di Malaysia atau dalam satu tempoh tertentu. Menerusi ini kita akan mengetahui jumlah sebenar populasi rakyat di negara ini melalui pengenalpastian perbezaan antara jumlah Warganegara Malaysia, Jumlah Pelawat Asing yang masuk ke negara kita sebagai pekerja ataupun dengan tujuan melancong.

Hal ini, akan memudahkan Kerajaan untuk merangka dan melaksanakan pelbagai pelan inisiatif mahupun bantuan seperti subsidi bersasar dan lain-lain agar setiap pelaksanaan tersebut dinikmati oleh rakyat di negara kita."

[Menteri Dalam Negeri]

10. PR-1523-U(27)286

Datuk Seri Panglima Madius Tangau [Tuaran] akan mencadangkan :

"Bahawa Dewan ini menerima hakikat bahawa lebih 100,000 calon peperiksaan SPM pada tahun 2022 telah gagal dalam mata pelajaran dan sekaligus gagal mendapat Sijil Pelajaran Malaysia (SPM).

Menerima hakikat juga bahawa kegagalan dalam peperiksaan SPM ini mengakibatkan masa depan yang gelap kepada calon pada purata 70 ribu hingga 100 ribu setahun.

Menerima hakikat bahawa pelajar tercicir ini tidak ada lagi ruang untuk melanjutkan pelajaran maka segolongan pelajar tercicir ini akan menjadi kerugian dalam sumber tenaga kerja negara.

Dan menerima hakikat bahawa matlamat mendidik sebuah generasi pelajar untuk membina dan membangun negara kita telah gagal maka Kerajaan hendaklah mengambil tindakan yang serius terhadap masalah ini.

Maka dengan itu Dewan Yang Mulia ini hendaklah membuat ketetapan agar silibus dan buku-buku teks Subjek Sejarah Tingkatan Satu, Dua, Tiga, Empat dan Tingkatan Lima hendaklah dikaji semula dan sebuah Jawatankuasa Pilihan Khas Parlimen hendaklah ditubuhkan untuk mendapat pandangan daripada setiap lapisan masyarakat daripada seluruh pelusuk negara, dan pada masa yang sama Jemaah Kabinet hendaklah menubuhkan sebuah Jawatankuasa Kabinet Kajian Semula Silibus dan Buku Teks Sejarah yang dianggotai oleh Menteri-Menteri yang mewakili Sabah, Sarawak, Persekutuan Tanah Melayu dan parti-parti politik yang menubuhkan Kerajaan Perpaduan."

[Menteri Pendidikan]

11. PR-1523-U(27)287

Datuk Seri Panglima Madius Tangau [Tuaran] akan mencadangkan :

"Bahawa Dewan ini Menerima hakikat bahawa sebuah Suruhanjaya Siasatan DiRaja yang ditubuhkan oleh Kerajaan suatu ketika dahulu telah berjaya membuat siasatan dan seterusnya telah dibentangkan di Dewan Yang Mulia ini.

Dan menerima hakikat bahawa setelah sekian lama laporan tersebut telah gagal dilaksanakan dan mengakibatkan ketidakpuasan hati sebahagian besar daripada rakyat Malaysia.

Menerima hakikat juga bahawa rakyat tertanya-tanya apakah yang telah terjadi dengan laporan Suruhanjaya Siasatan DiRaja tersebut.

Dan menerima hakikat bahawa kecelaruan urus tadbir Pendatang Tanpa Izin; Penduduk Asing di Sabah yang mempunyai Kad Pengenalan yang meragukan; Peningkatan Bilangan penduduk di Sabah Tanpa Kewarganegaraan ataupun *stateless children* dan kehadiran orang asing yang memegang dokumen IMM13 yang tidak ada halatuju.

Maka Dewan Yang Mulia ini hendaklah membuat ketetapan bahawa sebuah Jawatankuasa Pilihan Khas Parlimen untuk meneliti dan mengkaji semula rekomendasi dan perakuan Laporan Suruhanjaya Siasatan DiRaja Mengenai Pendatang Asing Tanpa Izin untuk merumuskan suatu Road Map penyelesaian tuntas terhadap masalah oleh empat kategori penduduk golongan pendatang asing di Sabah."

[Menteri Dalam Negeri]

12. PR-1523-U(27)290

Dato' Seri Dr. Shahidan bin Kasim [Arau] akan mencadangkan :

"Bahawa Dewan Rakyat ini menggesa supaya Kerajaan meletakkan sebuah garis panduan untuk sekolah-sekolah bagi pengurusan dana, perbelanjaan, dan juga aktiviti kutipan wang daripada pelajar, ibu-bapa, dan orang ramai. Selain itu, sebuah badan pemantau perlu diwujudkan bagi memastikan garis panduan ini dipatuhi. Ini kerana, kini sudah menjadi sebuah kelaziman untuk pihak-pihak sekolah menganjurkan program-program dan majlis-majlis yang memakan belanja besar, yang menggunakan duit daripada poket pelajar. Sebahagian daripada majlis ini mewajibkan kehadiran, dan sebahagian lainnya adalah secara sukarela. Tetapi harus kita faham, kewujudan jurang ekonomi akan membuatkan wujudnya golongan pelajar yang rasa keciciran sosial disebabkan faktor kewangan keluarga. Ia juga membuat mereka berasa tertekan serta memberi tekanan kepada ibu-bapa, lebih-lebih lagi dalam situasi ekonomi kini. Bukan sahaja untuk majlis, malah sering juga pihak sekolah membuat kutipan wajib bagi pembaharuan infrastruktur, dan kutipan ini kadangkala boleh mencecah ratusan ringgit. Isu ini merupakan sebuah isu yang kurang mendapat perhatian tetapi penting untuk dibawa ke hadapan kerana ia melibatkan sosioekonomi keluarga B40 dan M40 serta kesejahteraan perkembangan minda dan emosi para pelajar yang bakal menjadi teraju negara ini di masa hadapan. Selain itu, dibimbangi jika tiada pemantauan dilakukan, perkara ini akan membuka ruang untuk pihak tertentu mengambil kesempatan."

[Menteri Pendidikan]

13. PR-1523-U(27)291

Dato' Seri Dr. Shahidan bin Kasim [Arau] akan mencadangkan :

"Bahawa Dewan Rakyat ini menggesa supaya Kerajaan mengambil langkah pro-aktif dalam menangani serta menghentikan kes jenayah dera kanak-kanak di negara ini. Menteri Dalam Negeri pada 14 Mac 2023 melaporkan bahawa terdapat 220 kes kanak-kanak mati akibat penderaan antara tahun 2018 hingga 2022. Data Kementerian Pembangunan Wanita, Keluarga dan Masyarakat antara Januari hingga Jun 2022 juga mendedahkan terdapat 1,055 kes penderaan kanak-kanak di negara ini. Kanak-kanak adalah masa depan negara. Lantaran itu, pihak kerajaan wajar menangani lantas menghentikan kitaran dera ini dengan sebuah target 'Dera Sifar' menerusi langkah-langkah pro-aktif seperti mewajibkan kursus penjagaan anak, mewujudkan sistem pemantauan berkala, meneliti semula undang-undang serta garis panduan berkenaan penjagaan kanak-kanak, meningkatkan kesedaran masyarakat, dan lain-lain."

[Menteri Dalam Negeri]

14. PR-1523-U(27)292

Dato' Seri Dr. Shahidan bin Kasim [Arau] akan mencadangkan :

"Bahawa Dewan Rakyat menggesa Kerajaan mengambil tindakan yang lebih pro-aktif dan efisien bagi meningkatkan kesedaran, tindak balas, dan kerjasama masyarakat dalam menghadapi bencana alam. Kerajaan telah mengumumkan penubuhan Pusat Bencana Geologi Negara pada akhir tahun ini serta pembangunan Sistem Amaran Awal Tanah Runtuh (SAATR). Inisiatif ini akan dapat meningkatkan kecekapan tindak balas bencana agensi-agensi berkaitan. Bagaimana pula dengan tindak balas masyarakat."

Apa yang telah dan sedang Kerajaan usahakan bagi memastikan rakyat bukan sahaja peka tetapi takut dan patuh kepada arahan yang dikeluarkan oleh pihak berkuasa. Kerajaan perlu menguatkuasakan Akta Pertahanan Awam 1951, Akta 221 bawah seksyen 4 (C) di mana tindakan boleh diambil ke atas mereka yang tidak patuh kepada arahan pihak berkuasa contohnya arahan untuk berpindah dalam situasi banjir yang boleh membahayakan penduduk dan pada masa yang sama memberi risiko kepada penyelamat."

[Perdana Menteri]

15. PR-1523-U(27)293

Dato' Seri Dr. Shahidan bin Kasim [Arau] akan mencadangkan :

"Bahawa Dewan Rakyat ini menggesa supaya Kerajaan menubuhkan badan siasatan bebas bagi mengenal pasti secara terperinci punca utama yang menyebabkan kekurangan bekalan makanan seperti beras tempatan, ayam dan telur ayam di pasaran serta merangka perancangan penyelesaian jangka pendek dan panjang yang komprehensif termasuk penguatkuasaan terhadap golongan kartel orang tengah serta menambahkan daya pengeluaran bekalan makanan. Rakyat baik dari kalangan pengguna mahupun pengusaha restoran kecil masih mengeluh dengan permasalahan ini yang menyebabkan kenaikan harga bekalan makanan. Kerajaan tidak seharusnya melepaskan tanggungjawab menjaga keterjaminan bekalan makanan kepada individu (sebagai *end user*) mahupun menyarankan penyelesaian jalan mudah seperti menambah import makanan tetapi mencari penyelesaian sepanjang rangkaian jaringan bekalan bahan makanan mentah."

[Menteri Pertanian dan Keterjaminan Makanan]

16. PR-1523-U(27)294

Dato' Seri Dr. Shahidan bin Kasim [Arau] akan mencadangkan :

"Bahawa Dewan Rakyat ini menggesa Kerajaan supaya mewujudkan pusat benih padi khusus di kawasan utara khususnya di Arau, Perlis bagi membekalkan benih-benih padi yang bermutu tinggi dan membolehkan penyelidikan yang agresif dibuat bagi menghasilkan benih padi baru di samping menyelesaikan masalah ketidakcukupan benih padi di pasaran. Pusat Benih Padi adalah penting untuk mengumpul benih padi yang lebih berdaya komersial, lebih berdaya tahan iklim (*climate resistant*) dan sesuai dengan cuaca di kawasan utara Semenanjung Malaysia. Pusat ini juga boleh berperanan menjalankan kajian di peringkat serantau dan melibatkan penyelidik daripada negara-negara jiran seperti Thailand, Indonesia dan Myanmar yang mempunyai tanaman baka padi yang berdaya komersial tinggi."

[Menteri Pertanian dan Keterjaminan Makanan]

17. PR-1523-U(27)295

Dato' Seri Dr. Shahidan bin Kasim [Arau] akan mencadangkan :

"Bahawa Dewan Rakyat ini menggesa Kerajaan supaya mengkaji semula peruntukan khas yang boleh diberikan kepada pekebun kecil, penternak dan nelayan yang terjejas akibat situasi iklim yang tidak menentu serta kenaikan harga barang. Kerosakan tanaman dan kematian ternakan seringkali mendatangkan kerugian besar hingga kepada jutaan ringgit setiap kali berlaku bencana alam. Dengan situasi semasa ekonomi negara yang tidak stabil juga secara tidak langsung akan memberi tekanan kepada kos sara hidup pekebun kecil, penternak dan nelayan yang kebanyakannya bergantung harap kepada sumber pendapatan tersebut sahaja. Maka pemberian peruntukan khas ini dapat menambah baik kehidupan mereka."

[Menteri Pertanian dan Keterjaminan Makanan]

18. PR-1523-U(27)296

Dato' Seri Dr. Shahidan bin Kasim [Arau] akan mencadangkan :

"Bahawa Dewan Rakyat ini menggesa Kerajaan supaya menyegerakan pembinaan dan baik pulih tembok sempadan Malaysia-Thailand supaya merangkumi keseluruhan perbatasan dari Perlis hingga Kelantan dan menyediakan suatu pelan tindakan komprehensif merangkumi semua agensi Kerajaan bagi kawalan sempadan Malaysia-Thailand. Sempadan Malaysia-Thailand adalah sepanjang kira-kira 656km namun hanya 111 km sahaja yang berpagar. Sebahagian tembok sempadan antara Malaysia dan Thailand di sepanjang Laluan Keselamatan dan Pembangunan (KESBAN) dilihat sudah usang manakala peralatan kamera litar tertutup (CCTV) dan alat pengimbas perlu ditambah, dibaik pulih dan dinaik taraf dengan teknologi terkini seperti penggunaan dron. Beberapa insiden pada masa lalu seperti kes tembakan ke atas pasukan keselamatan negara dan bermaharajalelanya sindiket pemerdagangan manusia seperti yang berlaku di insiden Wang Kelian serta penyeludupan barangan termasuk dadah dan senjata menunjukkan betapa kritikalnya keperluan untuk meningkatkan tahap keselamatan di perbatasan. Kerajaan Malaysia sebelum ini telah memberikan komitmen untuk membina tembok sempadan tersebut tetapi sehingga terkini masih tiada pelan pembangunan komprehensif dan terperinci yang diumumkan. Mohon pihak kerajaan memandang serius perkara ini dengan menyegerakan pembangunan tembok sempadan Malaysia-Thailand secara menyeluruh dan memastikan suatu pelan komprehensif merangkumi semua agensi Kerajaan bagi kawalan sempadan Malaysia-Thailand agar benar-benar berkesan menjamin keselamatan perbatasan negara."

[Perdana Menteri]

19. PR-1523-U(27)297

Dato' Seri Dr. Shahidan bin Kasim [Arau] akan mencadangkan :

"Bahawa Dewan Rakyat ini menggesa Kerajaan supaya agihan peruntukan pembangunan dan pelaksanaan projek pembangunan di peringkat negeri diberikan mengikut keutamaan dan keperluan Kerajaan Negeri. Berdasarkan pelan RMK-12, enam negeri kurang membangun akan terus diberi keutamaan dengan agihan sekurang-kurangnya 50% daripada keseluruhan peruntukan Perbelanjaan Pembangunan Asas Persekutuan. Namun begitu, terdapat beberapa projek yang diluluskan oleh Kerajaan Persekutuan tidak mengambil kira cadangan dan hasrat Kerajaan Negeri khususnya di Perlis untuk mempelbagaikan fungsi sesuatu projek sedangkan Kerajaan Negeri mempunyai dasar serta hala tuju yang telah mengambil kira pelbagai keperluan dan kehendak semasa serta pada masa hadapan. Misalnya, Projek Lencongan Banjir Barat Timah Tasoh yang telah dilaksanakan pada tahun 2015, di mana dalam pembinaan terowong banjir terdapat skop pembinaan pada item pencahayaan di dalam terowong berjumlah RM300 ribu. Namun, skop berkenaan telah dikeluarkan atas alasan penjimatan. JPS Perlis selaku pelaksana projek telah membangkitkan perkara ini supaya dikekalkan atas faktor keselamatan dan memudahkan kerja pemantauan serta penyelenggaraan di dalam terowong di masa hadapan. Akan tetapi, ianya masih tetap dikeluarkan daripada skop asal projek."

[Menteri Ekonomi]

20. PR-1523-U(27)298

Dato' Seri Dr. Shahidan bin Kasim [Arau] akan mencadangkan :

"Bahawa Dewan Rakyat ini menggesa Kerajaan supaya mengkaji dan merancang satu inisiatif khas bagi memastikan setiap rakyat dan keluarga Malaysia terutamanya dari golongan B40 dan M40 mampu memiliki kediaman pertama dengan menyediakan rumah mampu milik berharga RM200,000 dan ke bawah baik di luar dan di dalam bandar. Kerajaan tidak boleh hanya memperkenalkan inisiatif yang hanya sekadar '*rebranding*' daripada Kerajaan sebelum ini kerana perubahan yang besar perlu dilakukan bagi mendepani kenaikan kos pembinaan disebabkan kenaikan harga barang binaan. Dasar Perumahan Negara (2018-2025) sendiri memperakui bahawa isu kemampuan memiliki rumah semakin ketara di kalangan rakyat dan impak kenaikan harga rumah yang mendadak turut dirasai golongan M40 selain B40. Inisiatif khas untuk menyediakan kemudahan rumah pertama pada harga di bawah RM200,000 dan ke bawah ini hendaklah dijadikan salah satu sasaran kajian semula Dasar Perumahan

Negara dan memerlukan input dari pelbagai Agensi dan Kementerian serta pihak bukan Kerajaan dan bukan dari satu Kementerian sahaja. Isu kemampuan memiliki rumah pertama jika tidak ditangani akan mewujudkan generasi rakyat yang sentiasa menyewa tanpa mendapat peluang memiliki perumahan sendiri. Golongan generasi ini juga akan terus menjadi mangsa kepada harga hartanah yang melambung akibat spekulasi hartanah dan tanpa kawalan harga sehingga menjadikan harga di luar kemampuan sebenar golongan M40 dan B40."

[Perdana Menteri]

21. PR-1523-U(27)299

Dato' Seri Dr. Shahidan bin Kasim [Arau] akan mencadangkan :

"Bahawa Dewan Rakyat ini menggesa Kerajaan melaksanakan segera projek-projek tebatan banjir di seluruh negara untuk memastikan projek ini dilaksanakan secara holistik dan dapat mencari jalan penyelesaian kepada isu banjir yang semakin meruncing akibat kesan perubahan iklim dan pembangunan yang tidak mesra alam. Antara projek yang perlu dilaksanakan segera adalah seperti Projek Pembangunan Sungai Bersepadu (PLSB) Sungai Golok (KESBAN) dan Sungai Kelantan. Dengan pembinaan projek tersebut, risiko banjir besar dapat dikurangkan. Di samping itu, projek tebatan banjir di Selangor khususnya di Shah Alam dan bandar Kuala Lumpur juga diharapkan dapat dilaksanakan dengan komprehensif agar dapat menangani masalah banjir kilat."

[Menteri Sumber Asli, Alam Sekitar dan Perubahan Iklim]

22. PR-1523-U(27)300

Dato' Seri Dr. Shahidan bin Kasim [Arau] akan mencadangkan :

"Bahawa Dewan Rakyat ini menggesa supaya Kerajaan melaksanakan satu perancangan persediaan dan pengurusan risiko bagi menghadapi bencana alam dapat disemak semula akibat impak perubahan iklim yang sangat drastik sejak kebelakangan ini. Hal ini demikian kerana perancangan rapi penting bagi memastikan tahap kesiapsiagaan anggota terlibat berada di tahap yang tinggi. Di samping itu, Kerajaan juga perlu merencana satu langkah holistik bagi mendidik masyarakat agar bersiaga siaga untuk menghadapi bencana alam kerana kesedaran terhadap isu ini di dalam kalangan masyarakat masih berada di tahap yang rendah berdasarkan peristiwa bencana alam yang lepas."

[Perdana Menteri]

23. PR-1523-U(27)301

Dato' Seri Dr. Shahidan bin Kasim [Arau] akan mencadangkan :

"Bahawa Dewan Rakyat ini menggesa Kerajaan supaya membentuk satu pasukan petugas khas bagi memberi perhatian terhadap isu pencerobohan sempadan yang berlaku di Sabah dan Sarawak. Seperti di ketahui, Sabah dan Sarawak pula berkongsi sempadan darat sejauh 2,019.5km dengan Kalimantan, Indonesia. Daratan Negara Brunei Darussalam dibatasi sepenuhnya oleh Sarawak sepanjang 481.3km. Kebanyakan kawasan perbatasan Malaysia bersama negara-negara jirannya terletak di kawasan perbukitan yang diliputi hutan tebal dan kawasan perairan laut menyebabkan kawalan terhadap kawasan-kawasan ini sulit dilakukan. Oleh sebab itu, masalah pencerobohan, penyeludupan, pemerdagangan manusia dan perdagangan narkotik adalah antara isu yang saban tahun masih berlaku dan sukar ditumpaskan. Dengan siapnya Lebuhraya Sematan – Telok Melano juga baru-baru ini secara tidaklangsungnya meningkatkan risiko pencerobohan sempadan sama ada melalui darat dan laut terutamanya melalui Taman Negara Tanjong Datu. Oleh hal yang demikian, tindakan segera Kerajaan bagi mencari solusi terbaik kepada masalah kawalan sempadan ini adalah amat diharapkan."

[Menteri Dalam Negeri]

24. PR-1523-U(27)302

Dato' Seri Dr. Shahidan bin Kasim [Arau] akan mencadangkan :

"Bahawa Dewan Rakyat ini menggesa Kerajaan supaya melaksanakan tindakan kawalan yang lebih ketat berkenaan jualan arak. Garis panduan yang khusus perlu dikaji dan diwujudkan oleh Kerajaan bagi mengawal penjualan arak yang meliputi waktu dan tempat jualan arak yang seragam dan boleh diguna pakai di seluruh negara bagi tujuan mengelakkan masalah sosial yang sering timbul seperti masalah rumah tangga dan kemalangan jalan raya. Oleh yang demikian, keseragaman tindakan daripada Kementerian Kewangan dan Pihak Berkuasa Tempatan (PBT) adalah amat diperlukan sekiranya ingin melaksanakan tindakan kawalan yang lebih ketat terhadap jualan arak kerana ketika ini ketidakseragaman tindakan antara dua entiti ini menjadi antara punca kawalan jualan arak tidak dapat dilaksanakan secara efektif dan efisien."

[Menteri Kewangan]

25. PR-1523-U(27)303

Dato' Seri Dr. Shahidan bin Kasim [Arau] akan mencadangkan :

"Bahawa Dewan Rakyat ini menggesa Kerajaan bersikap adil dalam mengamalkan kebebasan media di Malaysia. Kerajaan tidak seharusnya menjadikan Suruhanjaya Komunikasi Multimedia Malaysia (SKMM) sebagai alat politik untuk menyekat mana-mana isi kandungan media yang tidak '*pro*' Kerajaan atau tidak sependapat dengan Kerajaan. YAB Perdana Menteri yang memerintah Kerajaan pada masa ini telah berikrar dalam manifestonya untuk memastikan hak kebebasan bersuara dan melindungi kebebasan media. Namun, keadaan sebaliknya berlaku selepas beberapa bulan beliau membentuk Kerajaan. Lebih mendukacitakan, kebebasan media yang diwar-warkan Kerajaan hanyalah terhad kepada '*pro*' Kerajaan sahaja, manakala parti pembangkang secara halus dikenakan sekatan kepada akses media. Mana-mana media rasmi Kerajaan mahupun swasta tidak diberi kebenaran untuk menyiarkan berita mengenai parti pembangkang mahupun pihak yang menentang Kerajaan. Oleh demikian, Kerajaan digesa supaya berlaku adil dalam menyalurkan maklumat kepada rakyat. Tindakan ini adalah penting untuk memastikan hak kebebasan media tidak dicabul sewenang-wenangnya oleh pihak-pihak tertentu."

[Menteri Komunikasi dan Digital]

26. PR-1523-U(27)304

Dato' Seri Dr. Shahidan bin Kasim [Arau] akan mencadangkan :

"Bahawa Dewan Rakyat ini menggesa Kerajaan supaya menyediakan perancangan, peruntukan dan prasarana kepada pelajar-pelajar universiti, kolej, STPM dan SPM bagi menghadapi kaedah pembelajaran alaf baru seperti pembelajaran dalam talian dan menggunakan media elektronik. Ini bagi membolehkan dan mendedahkan mereka ke alam teknologi siber dan e-pembelajaran yang semakin berkembang yang seterusnya memerlukan guru-guru yang terlatih dalam pendidikan alaf baru."

[Menteri Pendidikan]

27. PR-1523-U(27)305

Dato' Seri Dr. Shahidan bin Kasim [Arau] akan mencadangkan :

"Bahawa Dewan Rakyat ini menggesa Kerajaan mengkaji semula kawasan keluar dan masuk sempadan Malaysia-Thailand di Wang Kelian, Perlis. Sebelum ini, penduduk kedua-dua negara boleh menikmati kemudahan bergerak sehingga dua kilometer tanpa menggunakan pasport atau pas sempadan pada hari minggu. Kuatkuasa itu pernah dibuat bermula tahun 1993 hingga 2015. Akan tetapi, penarikan semula kemudahan kebebasan bergerak ini telah dibuat pada tahun 2015 kerana penemuan rangka manusia mangsa sindiket pemerdagangan manusia yang dipercayai etnik Rohingya. Susulan itu, Wang Kelian menjadi pekan mati hingga kini. Kerajaan Negeri Perlis cuba membangunkan semula kawasan pelancongan di Wang Kelian, namun ianya tidak semeriah dahulu. Justeru itu, Kerajaan diharapkan dapat mengkaji dan mempertimbangkan semula untuk memberi kemudahan bergerak di antara kedua-dua negara seperti sebelum ini. Dengan kemudahan tersebut, ianya akan dapat menjana semula perkembangan ekonomi khususnya buat penduduk tempatan yang sebelum ini amat rancak sebelum ditutup sepenuhnya pada tahun 2015. Semasa adanya '*Free Flow*' ini, Wang Kelian merupakan satu destinasi pelancongan yang amat meriah dan telah memberi ruang kepada peniaga-peniaga kecil di Perlis dan juga Selatan Thailand menambahkan pendapatan mereka."

[Menteri Dalam Negeri]

RISALAT-RISALAT YANG DIBAWA KE DALAM MESYUARAT
(DEWAN RAKYAT)

<u>TAHUN</u> <u>2023</u>	<u>RISALAT/DOKUMEN</u>	<u>TARIKH</u> <u>DIBENTANGKAN</u>
CMD. 52	Laporan Tahunan Suruhanjaya Perkhidmatan Kehakiman dan Perundangan (SPKP) Bagi Tahun 2022	2 November 2023

****UCAPAN-UCAPAN
(PERATURAN MESYUARAT 17)
(KAMAR KHAS)**

Tarikh Ucapan	Ahli Yang Berucap	Tajuk Ucapan	Menteri Yang Bertanggungjawab
1. 02.11.2023 (Khamis)	1. YB Dr. Kelvin Yii Lee Wuen (Bandar Kuching)	1. Rancangan Membina atau Mengiktiraf Sekolah Sukan Kebangsaan di Sarawak	1. YB Menteri Pendidikan
2. 02.11.2023 (Khamis)	2. YB Dr. Kelvin Yii Lee Wuen (Bandar Kuching)	2. Status Penurunan Kuasa dan Penyerahan Balik Pelabuhan Bintulu	2. YB Menteri Pengangkutan
3. 02.11.2023 (Khamis)	3. YB Tuan Haji Mohd Hasnizan bin Harun (Hulu Selangor)	3. Meningkatkan Hasil dan Pendapatan Peneroka FELDA	3. YB Menteri di Jabatan Perdana Menteri
4. 02.11.2023 (Khamis)	4. YB Tuan Haji Mohd Hasnizan bin Harun (Hulu Selangor)	4. Naik Taraf Bangunan Operasi, Fasiliti dan Kebajikan Guru Program Pemulihan Dalam Komuniti (PDK)	4. YB Menteri Pembangunan Wanita, Keluarga dan Masyarakat

**** Ucapan Di Bawah Usul Berkenaan Perkara Tadbir Kerajaan (Peraturan Mesyuarat 17)**